



Eth president Torra en Aran: “Catalonha arreconeish as realitats nacionaus un dret que tanben volerie veir arreconeishut entada era”

- **Eth cap der Executiu s’a amassat damb eth sindic, Carlos Barrera, abans dera prumèra reünion qu’eth Govèrn dera Generalitat celèbre ena Val d’Aran**
- **Quim Torra a ratificat ath sindic er acòrd de finançament d’Aran, qu’aurà ua validitat de cinc ans e “da ua estabilitat fòrça desirada ath Conselh Generau”**

Eth president dera Generalitat, Quim Torra, a destacat aguest maitin qu’eth Parlament de Catalonha arreconeish eth dret deth pòble aranés a decidir eth sòn futur e a assegurat que **“ei atau coma era libertat e era democracia se daurissen camin en sègle XXI”**. **“E ei per açò que Catalonha arreconeish as realitats nacionaus un dret que tanben volerie arreconeishut entada era”**, çò a precisat.

Eth cap der Executiu a hèt aqueres declaracions dempús d’amassar-se damb eth sindic d’Aran, Carlos Barrera, ena sedença deth Conselh Generau. Ena amassada an tanben assistit era conselhèra dera Presidència e pòrtavotz deth Govèrn, Elsa Artadi, e eth vicesindic d’Aran, César Ruiz Canela. De contunh, eth president a dirigit çò qu’a estat era prumèra reünion deth Govèrn dera Generalitat en Aran.

Pendent era amassada, Quim Torra a ratificat ath sindic er acòrd de finançament d’Aran que, çò a explicat, **“aurà ua validitat de cinc ans e da ua estabilitat fòrça desirada ath Conselh Generau”**. En aguest sens, a anonciat que pendent era reünion deth Govèrn s’aprovarà un paquet de mesures **“destinades a reforçar er autogovèrn aranés e a potenciar un territòri singular damb personalitat pròpria”**.

En aguesta madeisha linha, eth president Torra a soslinhat qu’era arreconeishença d’Aran, ath delà dera lei de 2015, **“s’a tradusit ena creacion d’un Secretariat deth Departament de Presidència dera Generalitat entà dotar as relacions damb aguest territòri d’un estrument de reng superior”**. E a ahijut qu’**“ei era voluntat deth Govèrn que presidís, desvolopar era lei que definís eth regim especiau d’Aran en totes es sues capacitats e possibilitats”**.

Escomesa tàs Jòcs Olímpics d’luèrn

“Es melhores opcions d’Aran an a veir damb aguest desvolopament der autogovèrn, damb eth finançament just, e damb es naues oportunitats que se presenten enes ans a vier”, çò a assegurat e n’a metut coma exemple **“de camin a explorar e qu’ei ua escomesa deth Govèrn”** es Jòcs Olímpics d’luèrn a trauès dera candidatura Pirenèus-Barcelona. **“Cau saber profiter toti amassa aguest projècte entà méter tot eth Pirenèu en lòc a on reauments pòt arribar”**, çò a soslinhat.



Egalament, a escomés entà **“profitar es sinèrgies actuaus entà assolidar un moment de plenitud enes relacions bilateraus entre es dus païsi, entre es dues realitats nacionaus”**. E a hèt ua crida a potenciar **“aguesta ententa catalanoaranesa entà reforçar es nòsti païsi coma baluards dera democracia e dera libertat en un moment cambiant e incert”**.

En aquest sens, a soslinhat qu’**“eth progrès e era prosperitat des aranesi beneficiarà tostemp eth benèster, eth progrès e era prosperitat des catalans”**. E a ahijut qu’**“ei atau coma comprenem era manèra de restacar-se entre nacions: establint pònts, en tot melhorar es condicions de vida, en tot escambiar cultura e lengua, en tot respectar es realitats istoriques e, sustot, es desirs de present e de futur”**.